

[Paris], 25. August 1550

An Johannes Oporinus

UB Basel, Fr. Gr. I 11, fol. 151r.
Steinmann Nr. 652.

S. P. D. Literae tuae binae Calendis Iunij datae, mihi tertio mense post redditae sunt. Ante illas vnà cum supellectile mea tuum epistolium acceperam. E quibus omnibus, id quod mihi dubium nunquam fuit, quanta me benevolentia prosequaris, intellexi, id autem, quid de Vascosau contractu animi habeas, quod et tua et illius non parum refert, cognoscere non potui. neque id mirum. nostras enim ea de re scriptas literas nondum acceperas. Quo minus autem ad nos interea scripseris, tabellariorum penuriam in causa esse puto. Ego verò, cum Bibliopola hic multò post te visurus sit, et interea me responsum et a te et a dominis meis, quos me parum habere propitos puto, accepturum sperem: nunc, rebus omnibus incertissimis, vnum hoc scribere possum, amicitiam tuam mihi expetendam esse διά τε τὸ καλὸν, καὶ τὸ ἡδὺ. περὶ δὲ τοῦ χρησίμου ὅπερ τὸ τρίτον φιλίας εἶδος ἀριστοτέλης εἰσάγει, ἐκεῖνό μοὶ δοκεῖ ποιητέον, ὅπερ ἀν ἡμᾶς ὁ καιρὸς, ὡς πείθεσθαι κελεύοντιν οἱ σοφοὶ, διδάξῃ. quanquam equidem non parum vereor, ne eò me valetudo breui redigat, ὥστε μήτε χρήσιμον ἔτι μήτε ἡδύν με τοῖς φίλοις γενέσθαι. ἔαν δὲ τοῦτο γένηται, φοβοῦμαι μὴ εἰς στενὸν κομιδῆ μοὶ τὰ τῆς διὰ τὸ καλὸν ἐλπίδος καταστήσηται. Quanquam enim de tua liberalitate non dubito, cuius vtinam αὐταρκῆ χορηγίαν deus tibi suppeditet, tamen me tuis esse inuisum et grauem, morte mihi esset acerbius. πεπειραμένος, ταῦτα λέγω, ἐν τῇ περὶ τὸν βίον ἀτυχίᾳ καὶ ἐν κινδύνοις, οὐ μόνον ὑπεροπτικοῦ ὅγκου τῶν φιλτάτων εἶναι μοι δοκούντων, ἀλλὰ καὶ δεινοτάτης ὕβρεως καὶ τῶν ἐσχάτων ἐπιβουλῶν, ἐν τε τῇ Νωριμβέργῃ καὶ ἐν ἑτέρᾳ καὶ μείζονι πόλει. Etsi autem, vt dixi, tale nihil a te aut tuis metuo, quorum summam humanitatem, quae mihi gratissima est, sum expertus: ignoscendum tamen esse puto imbecillitati animi mei πλειστάκις πληγέντος, omnia etiam tuta timentis. Nam illud quod tantis aerumnis sum venatus, vt praesidia patronorum in omni fortuna parata haberem, si parum successit, ego feci quod debui et potui, caetera deo committenda sunt, cui curae futuri sumus, ne simus omnium ope destituti. Vale. et me, vt facis, commendatum habe, tibique honestissime cupere ne dubita. 8 Cal[endas] Septembbris Anno 1550.

Hiero[nymus] Wolfius T[uus].